

IMPAK PEKERJA ASING

Oleh Firdaus Aqmal Azman

KEBANJIRAN warga asing ke Malaysia bagai tidak dapat dibendung oleh negara kita. Peraturan dan undang-undang sedia ada dilihat sempurna namun banyak kelemahan dari segi pelaksanaan oleh penguat kuasa yang dipertanggungjawabkan. Mengikut laporan, sebanyak 6.7 juta pekerja asing mencari rezeki secara sah dan haram sama ada melalui udara, darat dan laut.

Lambakan warga asing ke negara ini banyak menggunakan visa pelancong. Mereka kebanyakannya bukan bertujuan untuk melancong tetapi mencari makan di tempat maksiat yang banyak "bak cendawan tumbuh" di bandar besar. Betapa banyaknya wanita dari China, Vietnam, Thailand dan Indonesia bekerja di pusat-pusat judi dan rumah urut. Setiap kali dicekup semasa operasi, mereka akan kembali semula ke sini seolah-olah negara tidak tahu berbuat apa-apa lagi. Begitu juga warga Afrika yang tujuan dan matlamat kedatangan mereka amat diragui.

Banyak faktor yang membawa gejala sosial dan maksiat bermaharajalela. Paling menakutkan ialah kes-kes jenayah yang melibatkan warga asing ini. Warga Bangladesh sering terbabit dengan jenayah seksual dan menculik rakan senegara

untuk mendapatkan wang tebusan. Warga Myanmar pula terlibat dengan pembunuhan sadis rakan senegara mereka yang berpunca daripada pertikaian etnik dan agama, lalu melunaskan dendam di bumi Malaysia.

Ancaman keselamatan contohnya insiden di Lahad Datu menunjukkan betapa bahaya jika pendatang asing menjadi majoriti di sesuatu kawasan dan pihak berkuasa pula cuai dengan tugas pengawasan.

Jumlah pekerja asing yang lebih ramai di ibu kota contohnya pada hari minggu mengundang keresahan rakyat tempatan kerana bimbang akan keselamatan mereka.

Selain itu, penyakit TB muncul di Malaysia disyaki dibawa oleh pekerja asing yang sakit. Bahkan denggi juga banyak dikesan di kawasan penempatan mereka yang tidak dijaga dengan baik.

Selain itu, mereka turut membawa budaya negara asal ke Malaysia. Warga Afrika gemar meminum arak di khalayak awam dan membuat bising. Semua pihak haruslah tegas dalam menjalankan amanah dan tanggungjawab agar Malaysia tidak dijadikan "Syurga Pendatang Asing".

